

撰述  
支那

釋迦譜

卷之六



6  
13  
6

道通文庫  
文庫 6  
194  
6



緣

釋迦譜卷第六

蕭

齊

釋

僧

祐

樂王寺

撰

增王顯武藏國  
入開郡所次町

釋迦在七佛末種姓衆數同異譜第五  
佛告諸比丘過去九十一劫時世有佛名毗婆尸如  
來至真出現于世復次過去三十一劫有佛名尸棄  
如來至真出現於世復於彼三十一劫中有佛名毗  
舍婆如來至真出現於世復次此賢劫中有佛名拘  
樓孫又名拘那含又名迦葉我今亦於賢劫中成最  
正覺毗婆尸佛時人壽八萬歲尸棄佛時人壽七萬  
歲毗舍婆佛時人壽六萬歲拘樓孫佛時人壽四萬



歲拘那含佛時人壽三萬歲迦葉佛時人壽二萬歲  
我今出世人壽百歲少出多減毗婆尸佛出剎利種  
姓拘利若尸棄佛毗舍婆佛種姓亦爾拘樓孫佛出  
婆羅門種姓迦葉增一阿含云姓頗羅墮拘那含佛  
迦葉佛種姓亦爾我今如來至真出剎利種姓曰瞿  
曇毗婆尸佛坐波羅樹下成最正覺尸棄佛坐分陀  
利樹下成最正覺毗舍婆佛坐娑羅樹下成最正覺  
拘樓孫佛坐尸利沙樹下成最正覺拘那含佛坐烏  
暫樹下成最正覺迦葉佛坐尼拘律樹下成最正覺  
我今如來正真坐鉢多樹下成最正覺

毗婆尸如來三會說法初會弟子有十六萬八千人  
二會弟子有十萬人三會弟子有八萬人尸棄如來  
亦三會說法初會弟子有十萬人二會弟子有八萬  
人三會弟子有七萬人毗舍婆如來二會說法初會  
弟子有七萬人次會弟子有六萬人拘樓孫如來一  
會說法弟子四萬人拘那含如來一會說法弟子三  
萬人迦葉如來一會說法弟子二萬人我今一會說  
法弟子千二百五十人毗婆尸佛有二弟子一名騫  
茶二名提舍諸弟子中最為第一尸棄佛有二弟子  
一名阿毗浮二名三婆婆諸弟子中最為第一毗舍



婆佛有二弟子一名扶遊一名鬱多摩諸弟子中最  
爲第一拘樓孫佛有二弟子一名薩尼一名毗樓諸  
弟子中最爲第一拘那含佛有二弟子一名舒槃那  
二名鬱多樓諸弟子中最爲第一迦葉佛有二弟子  
一名提舍二名婆羅婆諸弟子中最爲第一今我二  
弟子一名舍利弗一名目犍連諸弟子中最爲第一  
毗婆尸佛有執事弟子名曰無憂尸棄佛執事弟子  
名曰忍行毗舍婆佛有執事弟子名曰寂滅拘樓孫  
佛有執事弟子名曰善覺拘那含佛有執事弟子名  
曰安和迦葉佛有執事弟子名曰善友我執事弟子

名曰阿難毗婆尸佛有子名曰方友尸棄佛有子名  
曰無量毗舍婆佛有子名曰妙覺拘樓孫佛有子名  
曰上勝拘那含佛有子名曰導師迦葉佛有子名曰  
進軍今我有子名曰羅睺羅毗婆尸佛父名槃頭剎  
利王種母名槃頭婆提王所治城名槃頭波提尸棄  
佛父名明相剎利王種母名光曜王所治城名曰光  
相毗舍婆佛父名善澄剎利王種母名稱戒王所治  
城名曰無喻拘樓孫佛父名禮得婆羅門種母名善  
枝王名安和隨王名故城名安和拘那含佛父名內  
德婆羅門種母名善勝是時王名清淨隨王名故城



名清淨迦葉佛父名曰梵德婆羅門種母名財主是時王名婆毗王所治城名波羅柰釋迦文佛父名淨飯刹利王種母名太清淨妙王所治城名迦毗羅衛觀佛三昧經云毗婆尸佛身長六十由旬圓光百二十由旬尸棄佛身長四十二由旬圓光四十五由旬通身光一百由旬毗舍婆佛身長三十二由旬圓光四十二由旬通身光六十二由旬拘留孫佛身長二十五由旬圓光四十二由旬通身光五十由旬拘那含牟尼佛身長二十五由旬圓光三十由旬通身光長四十由旬迦葉佛身長十六丈釋迦牟尼佛身長

丈六圓光七尺七佛身金紫金色

祐尋七佛相次化跡各殊夫法身平等非有優劣衆生業異故現應不同耳是以釋迦出世身相紫金而一千比丘咸見赭容十六信士偏覩灰色自彼見異佛恒壹也類此而言可無惑矣

釋迦同三千佛緣譜第六

出藥王藥上觀經

釋迦牟尼佛告大衆言我昔無數劫時於妙光佛末法之中出家學道聞五十三佛名聞已合掌心生歡喜復教他人令得聞持他人聞已展轉相教乃至三千人此三千人異口同音稱諸佛名一心敬禮以是



因緣功德力故即得超越無數億劫生死之罪其千  
人者華光佛為首下至毗舍於莊嚴劫得成佛道過  
去千佛是也此中千佛者拘樓孫佛為首下至樓至  
如來於賢劫中次第成佛後千佛者日光如來為首  
下至須彌相於星宿劫中當得成佛現在十方諸佛  
善德如來等亦得聞是五十三佛名故於十方世界  
各得成佛過去五十三佛名在藥王藥上觀經三千  
佛名在諸佛集功德華經千佛名號國土種姓父母  
弟子眷屬聚會年歲在賢劫經釋迦在賢劫中千佛  
第四成佛

祐仰惟大覺之緣感也至矣極矣夫聞名致敬則勝  
業肇於須臾憑心相化則妙果成於曠劫故五十三  
聖聲喚微塵之前三千至真光鑠恒沙之後雖合掌  
之因似賒而樹王之報漸及禮拜稱讚豈虛業哉

釋迦内外族姓名譜第七

出長阿含經

釋種尸休羅王有四子

此出彌沙塞律案長阿含經  
曇無德律大智論並云師子

頽生淨飯王

一名淨飯

大智論同十二遊經  
云菩薩父名白淨王

二名白飯

大智論同十二遊經云  
菩薩叔父名甘露淨王

三名斛飯

大智論同十二遊經云  
菩薩中叔名穀淨王



四名甘露飯

大智論同十二遊經云菩薩小叔名設淨王

淨飯有二子一名菩薩

大智論同十二遊經云白淨王有二子其太子名悉達

二名難陀

大智論同十二遊經云其小子名難陀

白飯有二子一名阿難

二名調達大智論云白飯二子跋提提沙十二

遊經云甘露淨王有二子長子名調達小子名阿難

斛飯有二子一名摩訶男

二名阿那律大智論云斛飯二子提婆

達多阿難十二遊經云穀淨王有二子太子名釋摩納小子名阿那律

甘露飯有二子一名婆娑

二名拔提大智論云甘露飯二子摩訶男

阿泥盧豆有一女名甘露味雜阿含云提沙比丘是佛姑子兄弟十二遊經云設淨王有二子太子名釋迦王小子名釋沙王尋此四王名號次序及生子名字互有同異正其然否寄之來哲其淨飯白淨直淨

悅頭檀輪頭檀眾經名各不同蓋是譯出致異即是人耶阿泥盧豆即阿那律推例而求想多如此

調達四月七日食時生身長丈五寸

四寸遊經

菩薩四月八日夜半明星出時生身長丈六寸

出十二遊經

佛弟難陀以四月九日生身長丈五寸

四寸遊經

阿難以四月十日生身長丈五寸

三寸遊經

菩薩外家去迦維羅闍城

晉言八百里姓瞿曇氏作

小王主百萬戶名一億王

出十二遊經釋迦王王下又云菩薩母名摩耶難陀

母名僑曇彌即大愛道也

菩薩婦家姓瞿曇氏舍夷長者名水光其婦名月女

有一城居近其邊生女之時日將欲沒餘明照其家



室內皆明因字之為瞿夷瞿夷晉言明女瞿夷是太子第一

夫人出十二遊經

太子第二夫人生羅云者名耶惟檀其父名移施長

者祐按瑞應本起善權衆經及大智論並云羅睺羅是瞿夷所生而十二遊獨云是第三夫人子從多

斷則宜以瑞應為正

第三夫人名鹿野其父名釋長者以有三婦故父王

為立三時殿殿有二萬妹女以太子當作遮迦主晉

飛行故三殿置六萬妹女出十二遊經

祐觀太覺俯應跡均俗典所以胤裔繼哲姻婭重明

金緣發曠劫故能讚靈化耳

△

釋迦弟子姓釋緣譜第八出增一阿含經

佛告諸比丘有四大河水從阿耨達泉出云何為四

所謂恒伽新頭婆叉私陀波恒伽水東流牛頭口出

新頭南流師子口出私陀西流象口中出婆叉北流

從馬口出是時四大河水繞阿耨達泉已恒伽入東

海新頭入南海婆叉入西海私陀入北海爾時四大

河入海已無復本名字同名為海此亦如是有四姓

云何為四刹利婆羅門長者居士種於如來所剝除

鬚髮著三法衣出家學道無復本姓但言沙門釋迦

子所以然者如來衆者其猶大海四諦其如四大河

姓



除其結使入於無畏涅槃城是故諸比丘諸有四姓  
剃除鬚髮以信堅固出家學道者彼當滅本名字自  
稱釋迦弟子所以然者我今正是釋迦子從釋種中  
出家學道比丘當知欲論生子之義者當名沙門釋  
種子之所以然者生皆由我生從法起從法成是故  
比丘當求方便得作釋種子如是諸比丘當作是學  
彌沙塞律云汝等比丘雜類出家皆捨本姓稱釋子  
沙門長阿含經云彌勒出世諸比丘弟子皆稱慈子  
如我今弟子  
稱爲釋子  
祐尋四河入溟俱名爲海四族歸道金號曰釋可謂  
總彼殊源同乎一味者矣

釋迦四部名聞弟子譜第九

此丘一百人出  
增一阿含經

佛言我聲聞弟子中第一初受法味思惟四諦寬仁  
博識善能勸化將養聖衆不失威儀即阿若拘隣比  
丘善能勸導福度人民即優陀夷比丘速成神通中  
不有悔即摩訶男比丘恒飛虛空足不蹈地即善財  
比丘乘虛教化意無榮冀即婆破比丘居樂天上不  
處人中即牛跡比丘恒觀惡露不淨之想即善勝比  
丘將護聖衆四事供養即優留毗迦葉比丘心意寂  
然降伏諸結即江迦葉比丘觀了諸法都無所著即  
象迦葉比丘威容端正行步詳序即馬師比丘智慧



無窮決了諸疑卽舍利弗比丘神足輕舉飛到十方  
卽大目犍連比丘勇猛精勤堪任苦行卽二十億耳  
比丘十二頭陀難得之行卽大迦葉比丘天眼第一  
見十方域卽阿那律比丘坐禪入定心不錯亂卽離  
越比丘能廣勸率施立齋講卽陀羅婆摩羅比丘安  
造房室與招提僧卽小陀羅婆摩羅比丘是貴豪種  
族出家學道卽羅吒婆羅比丘善分別義敷演道教  
卽大迦旃延比丘堪任受籌不違禁法卽軍頭婆歎  
比丘降伏外道履行正法卽賓頭盧比丘四事供養  
衣被飯食又瞻視疾病供給醫藥卽識比丘言論辯

了而無疑滯又能造偈誦歎如來德卽謂鵬耆舍此  
丘得四辯才觸難答對卽摩訶拘絺羅比丘清淨閑  
居不樂人中卽堅牢比丘乞食耐辱不避寒暑卽難  
提比丘獨處靜坐專意念道卽金毗羅比丘一坐一  
食不移于處卽施羅比丘守持三衣不離食息卽浮  
彌比丘樹下坐禪意不移轉卽狐疑離越比丘苦身  
露坐不避風雨卽婆蹉比丘獨樂空閑專善思惟卽  
陀素比丘著五納衣不著榮飾卽泥婆比丘常樂塚  
間不處人中卽優多羅比丘恒坐草蓐越福度人卽  
盧醯寧比丘不與人語視地而行卽優鉢摩居江比



丘坐起行步常入三昧卽那提比丘好遊遠國教授  
人民卽曇摩留支比丘喜集聖衆論說法味卽伽梨  
比丘壽命極長終不中天常樂閑居不處衆中卽婆  
拘羅比丘能廣說法分別義理卽滿願子比丘奉持  
戒律無所觸犯卽優波離比丘得信解脫意無猶豫  
卽婆迦利比丘天體端正與世殊異諸根寂靜心不  
變易卽離陀比丘辯才卒起解人疑滯卽婆陀比丘  
能廣說義理不有違卽斯尼比丘喜著好衣行本清  
淨卽天須菩提比丘常好教授諸在後學卽難陀迦  
比丘善誨禁戒比丘尼僧卽須摩那比丘功德盛滿

所適無短卽尸婆羅比丘具足衆行道品之法卽優  
波先迦滿陀子比丘所說和悅不傷人意卽婆陀先  
比丘修行安般思惟惡露卽摩訶迦延那比丘計我  
無常心無有想卽優頭盤比丘能雜種論暢悅心識  
卽拘摩羅迦葉比丘著弊惡衣無所羞恥卽面王比  
丘不毀禁戒誦讀不懈卽羅云比丘以神足力能自  
隱晦卽般菟比丘能化形體作若干變卽周利般菟  
比丘棄族富貴天性柔和卽釋王比丘乞食無厭教  
化無窮氣力強盛無所畏難卽婆提婆羅比丘音響  
清徹聲至梵天卽羅婆那婆提比丘身體香潔熏于



四方卽爲迦闍比丘知時明物所至無疑所憶不忘  
多聞廣遠堪任奉上卽阿難比丘莊嚴服飾行步顧  
影卽迦持利比丘諸王敬待羣臣所宗卽月光比丘  
天人所奉恒朝侍省以捨人形像天之貌卽輸提比  
丘諸天師導指授正法卽天比丘自憶宿命無數劫  
事卽果衣比丘體性利根智慧深遠卽爲攝魔比丘  
能降伏魔外道邪業卽僧迦魔比丘入水三昧不以  
爲難廣有所識人所敬念卽質多舍利弗比丘入火  
三昧普照十方卽善來比丘能降伏龍使奉三尊卽  
那羅陀比丘降伏鬼神改惡修善卽鬼地比丘降乾

沓和勤行善行卽毗盧遮比丘恒樂空定分別空義  
志在空寂微妙德業卽須菩提比丘行無想定除去  
諸念卽耆利摩難比丘入無願定意不起亂卽炎盛  
比丘入慈三昧心無恚怒卽梵摩達比丘入悲三昧  
成就本業卽須彌比丘得喜行德無若干相卽婆彌  
陀比丘常守護心意不捨離卽躍波迦比丘行炎盛  
三昧終不解脫卽曇彌比丘言語麤獷不避尊貴入  
金光三昧卽比利陀婆遮比丘入金剛三昧不可沮  
壞卽無畏比丘所說決了不懷怯弱卽須泥多比丘  
恒樂寂靜意不處亂卽陀摩比丘義不可勝終不可



伏卽須羅他比丘曉了星宿豫知吉凶卽那伽波羅  
比丘恒喜三昧禪悅爲食卽婆私吒比丘常以法喜  
爲食卽謂須夜奢比丘恒行忍辱對至不起卽滿願  
盛明比丘修習日光三昧卽彌奚比丘明算術法無  
有差錯卽尼拘留比丘分別等智恒不忘失卽鹿頭  
比丘得雷電三昧不懷恐悚卽地比丘觀了身本卽  
頭那比丘最後取證獲得漏盡卽須拔比丘  
名聞比丘尼五十人

久出家學國王所敬卽太愛道瞿曇彌尼智慧聰明  
卽識摩尼神足第一感致諸神卽優鉢華色尼行頭

陀法無一限礙卽機利舍瞿曇彌尼天眼第一所照  
無礙卽奢拘利尼坐禪入定意不散卽奢摩尼分  
別義趣廣演道教卽波頭蘭闍那尼奉持律教無所  
加犯卽波羅遮那尼得信解脫不復退還卽迦梅延  
尼得四辯才不懷怯弱卽最勝尼自識宿命無數劫  
事卽拔陀迦毗離尼顏色端正人所愛敬卽臨摩闍  
尼降伏外道立以正教卽輸那尼分別義趣廣說分  
部卽曇摩提那尼著齋弊衣不以爲愧卽優多羅尼  
諸根寂靜恒若一心卽光明尼衣服齊整常如法教  
卽禪頭尼能雜種論亦無疑滯卽檀多尼堪任造偈



讚如來德卽天與尼多聞廣博恩惠接下卽瞿卑尼  
恒處閑靜不居人間卽無畏尼苦體乞食不擇貴賤  
卽毗舍佉尼一處一坐終不移易卽拔陀婆羅尼徧  
行乞求廣度人民卽摩訶訶利尼速成道果中間不  
滯卽陀摩尼執持三衣終不捨離卽須陀摩尼恒坐  
樹下意不改易卽瑒須那尼恒居露地不念覆蓋卽  
奢陀尼樂空閑處不在人間卽優迦羅尼長坐草蓐  
不著裝飾卽離那尼著五納衣以次分衛卽阿奴波  
摩尼樂空塚間卽優伽摩尼多遊於慈愍念生類卽  
清明尼悲泣衆生不及道者卽素摩尼喜得道者

及一切卽摩陀利尼護守諸行意不遠離卽迦羅伽  
尼守虛執空了定無有卽提婆修尼心樂無想除去  
諸著卽日光尼修習無願心恒濟物卽末那婆尼諸  
法無疑度人無限卽毗摩達尼能廣說義分別深法  
卽普照尼心懷忍辱如地容受卽曇摩提尼能教化  
人使立檀會辦具牀座卽須夜摩尼心已永息不興  
亂想卽因提闍尼觀了諸法而無狀足卽龍尼意強  
勇猛無所染著卽拘羅那尼入水三昧普潤一切卽  
婆須尼入火光三昧悉照萌類卽降提尼觀惡露不  
淨分別緣起卽遮波羅尼育養衆人施與所乏卽守



迦尼最後取證卽拔陀軍陀羅拘夷國尼  
名聞優婆塞四十人

初聞法藥成聖賢證卽三果商客第一智慧卽質多  
長者神德第一卽乾提阿藍降伏外道卽掘多長者  
能說深法卽優波掘長者恒坐禪思卽訶侈阿羅婆  
降伏魔官卽勇健長者福德盛滿卽闍利長者太檀  
越主卽須達長者門族成就卽泯逸長者好問義趣  
卽生漏婆羅門利根通明卽梵摩喻諸佛信使卽御  
馬摩納計身無我卽喜聞琴婆羅門論不可勝卽毗  
裘婆羅門言語速疾能造偈頌卽優波離長者喜施

好寶不有吝心卽殊提長者建立善本卽優迦毗舍  
離能說妙法卽最上無畏優婆塞所說無畏善察人  
根卽頭摩大將領毗舍離好喜惠施卽餅沙王所施  
狹少卽光明王建立善本卽波斯匿王得無根善信  
起歡喜心卽阿闍世王至心向佛意不變易卽優填  
王承事正法卽月光王供奉聖衆意常平等卽造  
祇洹王子常喜濟彼不自爲已卽師子王子顏貌端  
正與人殊勝卽雞頭王子善恭奉人無有高下卽無  
畏王子恒行慈心卽不足長者心恒悲念一切之類  
卽摩訶納釋種常行喜心卽拔陀釋種恒行護心不



失善行卽毗闍先優婆塞堪任行忍卽師子大將能  
雜種論卽毗舍御優婆塞賢聖默然卽難提波羅優  
婆塞勤修善行無有休息卽優多羅優婆塞諸根寂  
靜卽天優婆塞最後受證卽拘夷那竭摩羅  
名聞優婆夷三十人

初受道證卽難陀難陀婆羅優婆夷智慧第一卽久  
壽多羅優婆夷恒喜坐禪卽須毗耶女優婆夷慧根  
了了卽毗浮優婆夷堪能說法卽鶖竭闍優婆夷善  
演經義卽跋陀婆羅須焰摩優婆夷降伏外道卽婆  
修陀優婆夷音響清徹卽無憂優婆夷能種種論卽

婆羅陀優婆夷勇猛精勤卽須頭優婆夷第一供養  
如來卽摩利夫人承事正法卽須賴婆夫人供養聖  
衆卽捨彌夫人瞻視當來過去賢士卽月光夫人檀  
越第一卽雷電夫人恒行慈三昧卽摩訶先優婆夷  
行悲哀愍卽毗提優婆夷喜心不絕卽拔陀優婆夷  
行守護業卽難陀母優婆夷得信解脫卽照曜優婆  
夷恒行忍辱卽無憂優婆夷行空三昧卽毗雙先優  
婆夷行無想三昧卽優那陀優婆夷行無願三昧卽  
無垢優婆夷好教授彼卽尸利夫人優婆夷善能持  
戒卽鶖竭摩優婆夷形貌端正卽雷炎優婆夷諸根



寂靜即最勝優婆夷多聞博智即泥羅優婆夷能造頌偈修學迦那無所怯弱即須達女優婆夷最後取證優婆夷者即藍優婆夷

祐歷觀學者業盛則聲流其在悠悠未足算也故十大弟子以第一為標四部之眾以名聞自顯所謂眾所知識出于其類者也嗟夫後進思自勗焉

婆夷三衆數中各長一人

釋迦從弟調達出家緣記第十

出中本起經

是時父王往詣佛所見迦葉千人形體至陋每心不平此等比丘雖復心精無表容貌當勸宗室樂無為

者令作沙門擇取端正即令宗族明日會殿受命即到王告宗室曰阿夷相言佛不出家當作聖王君四方天下左右侍從率當端正今諸弟子類無姿觀欲聘有道儀容足者充備僧數光暉世尊咸言大善聽令歡喜乞退嚴辦七日乃行調達便告行者吾等王者子弟今棄世榮出家居道整頓服飾極世之妙象馬車乘價直萬金其日嚴出觀者填路調達冠幘自然墮地衢和離所可乘象四脚布地而作鳥鳴相工占曰餘皆得道一人不吉俱詣佛所求作沙門剛強降伏莫不樂受調達亦名提婆達多齊言天熱以其



生時人天心皆忽驚熱故因爲名增一阿舍經云提婆達堯白佛言願聽在道次佛言汝宜在家分檀惠施夫爲沙門實爲不易復再三白復告不宜出家提婆達堯便生惡念此沙門懷嫉妬心我今宜自剃頭善修梵行何用是沙門爲提婆達堯後犯五逆罪惡心欲至如來所適下足在地地中有大火風起生繞提婆達堯身爲火所燒便發悔心稱南無佛然不究竟適得稱南無便入地獄中阿難悲泣言提婆達在地獄中爲經幾時佛言經一太劫命終生四天王上展轉至他化自在天經六十劫不墮三惡趣最後受

身成辟支佛名曰南無由命終之時稱南無故時大目犍連言我欲至阿鼻獄中見提婆達慰勞慶賀佛言阿鼻罪人不解人間音響目連白言我解六十四音當以此音往語彼人目連如屈伸臂頃至阿鼻獄上虛空中曰提婆達堯獄卒曰此間亦有拘樓秦佛迦葉佛時提婆達堯今命何者目連曰吾命釋迦文佛叔父兄提婆達堯獄卒燒炙彼身使令覺悟曰汝仰觀空中見大目連坐寶蓮華語目連曰尊者何由屈此目連曰如來記汝欲害世尊緣入阿鼻最後成辟支佛號名南無提婆達聞已歡喜言我今日以右



脅臥阿鼻獄中經歷一劫終無勞倦目連復問苦痛有增損乎提婆達報以熱鐵輪轢我身壞復以鐵杵攢咀我形有黑暴象踏蹋我體復有火山來鎮我面昔日袈裟化為銅鏃極為熾然今寄頭面禮世尊足復禮尊者阿難目連即攝神足還世尊所太智論稱提婆達弟子俱迦離謗舍利弗及目健連命終墮蓮華地獄中即衢和離也右拾檢調達之歷緣也亟為戚屬恒結仇讐豈以標明善惡影響秘教乎是故經言若言提婆達多造逆罪墮阿鼻者無有是處斯乃諸佛境界非二乘所測也

釋迦從弟阿那律跋提出家緣記第十一

德律

釋種兄弟二人一名摩訶男一名阿那律阿那律者其母愛念常不離目前與作三時殿姪女娛樂摩訶男言諸釋多出家而我一門獨無兄營家業弟當出家若不能者弟營家業兄當出家那律以家事煩碎遂欲出家往白其母乞求出家乃至三反母不聽許種種方便斷之以釋種有跋提其母愛重必不聽出家便言若跋提出家者當聽汝耳那律便求跋提跋提不許復種種方便云我今出家一由汝耳跋提遂許還求其母其母亦不許復作方便言若阿那律母



許兒者當聽汝耳遂爾彼許跋提言且當七年受五  
欲樂然後出家那律言人命無常難可得保不宜淹  
留更求一年乃至七日那律許之過七日已釋子等  
八人及優波離第九各好莊嚴乘寶象馬出迎毗羅  
衛齊至其界脫其實衣以象馬付優波離令還語言  
汝常依我等以自存活今者出家以此寶衣大象相  
遺與自資生遂便前去優波離思惟亦欲隨出家便  
卽以寶衣等懸著樹上念言其有來取之者與之於  
是便共至佛所求索出家言我父母已許願聽出家  
乞先度優波離何以故以除我等憍慢心故爾時世

尊先度優波離次度那律次度跋提次更度難提次  
度金毗羅次度難陀等六人優波離受大戒最爲上  
座時有大上座名毗羅茶別度阿難陀餘次上座度  
跋難陀及調達時跋提獨在樹下塚間思惟夜分過  
已高聲稱言甚樂其邊比丘白佛佛呼跋提問何故  
自言甚樂耶跋提言我本在家時內外常以刀杖而  
自衛護猶有恐懼念念憂畏今獨塚間無有恐懼身  
毛不豎我念出離之樂故稱甚樂佛言善哉  
祐以爲俗滯難啓而法緣易感二釋蘄道尅意實深  
故始也互塞終然兩開矣夫苦逼不生是謂至樂林



下之唱豈外適哉

釋迦從弟孫陀羅難陀出家緣記第十二

出普曜經

佛在迦維羅竭國尼拘類園將侍者阿難入城乞食童子難陀在高樓上遙見卽下來至佛所作禮自言如來之姓轉輪聖王何謂自辱持鉢乞食自取佛鉢人家內盛甘美飲食佛卽還尼拘類園卽語侍者難陀若出勿自取鉢勅語難陀躬自送來難陀受教從後送鉢婦出語言速還勿久須還乃食前進未久重更遣信時還勿停所以鄭重恐出家故難陀至佛所手白奉鉢唯願時受今欲還家佛告難陀卿已至此

今宜剃除鬚髮服三法衣何爲欲還是時如來以威神力逼迫難陀度令出家閉在靜室久久之後次第當直難陀歡喜我今當直事因此閑暇逃走還家是時難陀隨所應作事事不闕天神侍衛難陀汲水至澗自然翻棄淨地之中草土更滋開閉門戶戶自然開難陀自念我家王種多饒財寶設有漏失卽可償之今當竊隨小徑還家行大塗者儻值如來卽脫三法衣更被餘衣而去行未經時正值如來奔趣大樹欲自隱身佛神力故樹神拔樹懸在虛空難陀入樹根處隱蔽自身如來尋往問言何爲至此默然慚愧



佛再三告汝欲何趣難陀言暫欲還家與婦相見佛告難陀夫人學道貪著欲心不顧後世燒身之禍我今將汝天上遊觀宜自專心勿懷恐怖佛以神力接至天上見一宮殿衆寶莊嚴玉女營從不可稱計唯無夫主難陀問佛此何天宮種種娛樂快樂皆所未見而無夫主唯願說之佛告難陀汝可自問難陀奉教自往問之天女答曰汝不知乎迦維羅竭國釋迦文佛金父弟難陀後當生此爲我夫主難陀聞之密自歡喜還至佛所具以白佛佛告難陀快修梵行如是不久當來至此受福自然是時世尊復以神力接

引難陀將至地獄路經鐵圍山表見瞎獼猴佛問難陀汝婦孫陀利何如瞎獼猴難陀白佛止止勿復說此孫陀利者女中英妙百千萬倍豈得類乎佛言以孫陀利比諸天女亦億千萬倍不可爲比於是世尊復接難陀徧至地獄見種種苦痛有一大鑊獄卒圍縛湯沸火熾不見罪人難陀白佛是何人獄不見罪人佛言汝自問之難陀往問獄卒報言閻浮利地真淨王家兒得成佛道金父弟甘露王兒名曰難陀爲人放逸姪欲情多自恃豪族輕忽萬民彼命終後當來此中難陀聞已不毛皆豎顏色變異往趣世尊白



言唯然大師三界大護今覩此變倍懷恐懼求離地獄願說泥洹爾時世尊漸與難陀說微妙法安處無爲令至道場

雜寶藏經云佛在迦毗羅衛國入城乞食到難陀舍會值難陀與婦作粃香塗眉間聞佛門中欲出外看婦共要言出看如來使我額上粃未乾頃便還入來難陀即出見佛作禮取鉢向舍盛食奉佛佛不爲取過與阿難阿難亦不爲取阿難語言汝從誰得鉢還與本處於是持鉢詣佛至尼拘樓精舍佛即勅剃師與難陀剃髮難陀不肯怒拳而語剃髮人言迦毗羅

衛一切人民汝今盡可剃其髮也佛問剃髮者何以不剃答言畏故不敢爲剃佛共阿難自至其邊難陀畏故不敢不剃雖得剃髮恒欲還家佛常將行不能得去後於一日次守房舍而自歡喜今真得便可還家去待佛衆僧都去之後我當還家佛入城後作是念言當爲汲水令滿澡餅然後還歸尋時汲水一餅適滿一餅復翻如是經時不能滿餅便作是言俱不可滿使諸比丘來還自汲我今但著餅屋中而棄之去即閉房門適一扇閉一扇復開適閉一戶一戶復開更作是念俱不可閉就置而去縱使失諸比丘衣



物我饒財寶足有可償卽出僧房而自思惟佛必從此來我則從彼異道而去佛知其意亦異道來遙見佛來大樹後藏樹神舉樹在虛空中露地而立佛見難陀將還精舍而問之言汝念婦也答言實爾卽將難陀向阿那波山上又問難陀汝婦端正不答言端正山中有二老瞿獼猴又復問言汝婦孫陀利面首端正何如此獼猴也難陀懊惱便作念言我婦端正人中少雙佛今何故以我之婦止瞿獼猴佛復將至初利天上徧諸天宮而共觀看見諸天子與諸天女共相娛樂見一宮中有五百天女無有天子尋來問

佛佛言汝自往問難陀往問言諸宮殿中盡有天子此中何以獨無天子諸女答言閻浮提內佛弟難陀佛逼使出家以出家因緣命終當生於此天宮爲我天子難陀答言卽我身是便欲卽住天女語言我等是天汝今是人還捨人壽更生此間便可得往便還佛所以知上事具白世尊佛語難陀汝婦端正何如天女難陀答言止彼天女如瞿獼猴止於我婦佛將難陀還閻浮提難陀爲欲生天故勤加持戒阿難爾時爲說偈言

譬如羯羊鬪

將前而更却

汝爲欲持戒



其事亦如是

佛將難陀復至地獄見諸鑊湯悉皆煮人唯見一鑊  
炊沸空停怪其所以而來問佛佛告之言汝自往問  
難陀卽往問獄卒言諸鑊盡皆煮治罪人此鑊何故  
空無所煮答言閻浮提內有如來弟名爲難陀以出  
家功德當得生天以欲罷道因緣之故天壽命終墮  
此地獄是故我今炊鑊而待難陀難陀恐怖畏獄卒  
留卽作是言南無佛陀南無佛陀唯願將我擁護還  
至閻浮提內佛語難陀汝勤持戒修汝天福難陀答  
言不用生天今唯願我不墮此獄佛爲說法一七日

中成阿羅漢諸比丘歎言世尊出世甚奇甚特佛言  
非但今日乃往過去亦復如是諸比丘言過去亦爾  
其事云何請爲我說佛言昔迦尸國王名曰滿面比  
提希國有一姪女端正殊妙爾時二國常想怨嫉傍  
有佞臣向迦尸王歎說彼國有姪女端正世所希少  
王聞是語心生惑著遣使從索彼國不與重遣使言  
求暫相見四五日間還當發遣時彼國王約勅姪女  
汝之姿態所有伎能好悉具備使迦尸王惑著於汝  
須臾之間不能遠離卽遣令去經四五日尋復喚言  
欲設太祀須得此女暫還放來後當更遣時迦尸王



卽遣歸還太妃已訖遣使還索答言明日當遣旣至  
明日亦復不遣如是妄語經歷多日王心惑著單將  
數人欲往彼國諸臣勸諫不肯受用時仙人山中有  
獼猴王聰明博達多有所知其婦適死取一雌獼猴  
諸獼猴衆皆共瞋訶責此姪獼猴衆所共有何緣獨  
當時獼猴王將雌獼猴走迎尸國投於王所諸獼猴  
衆皆共追逐旣到城內發屋壞墻不可料理迎尸國  
王語獼猴王言汝今何不以此雌獼猴還諸獼猴獼猴  
王言我婦死去更復無婦王今云何欲使我歸王語  
之言今汝獼猴破亂我國那得不歸獼猴王言此事

不好耶王答言不好如是再三王故言不好獼猴王  
言汝宮中有八萬四千夫人汝不愛樂欲至敵國追  
逐姪女我今無婦唯取此一汝言不好一切萬姓視  
汝而活爲一姪女云何捐棄太王當知姪欲之事樂  
少苦多猶如逆風而執熾炬愚者不放必見燒害欲  
爲不淨如彼屎聚欲現外相薄皮所覆欲無反復如  
屎塗毒蛇欲如怨賊詐親附人欲如假借必當還歸  
欲爲可惡如廁生華欲如疥瘡而向於火把之轉  
欲如狗噉枯骨涎唾共合謂爲有味唇齒破盡不知  
厭足欲如渴人飲於鹹水逾增其渴欲如段肉衆鳥



競逐欲如魚獸貪味至死其患甚大爾時獼猴王者  
 我身是也爾時王者難陀是也爾時婬女者孫陀利  
 是也我於爾時欲淤泥中拔出難陀今亦拔其生死  
 之苦

釋迦譜卷第六

音釋

騫丘虔切赭止野切吖吖奉甫切咀咀在呂切

歸安居土嚴爾珪捐貲刻此計字九千八百五十一箇

該銀四兩九錢二分六厘伏願

六根雪淨三障水清即生啓悟妙心世世弘開

道眼龍山釋海瓊對

崇禎五年孟春月徑山化城寺識



早稲田大学図書館

011488555326